

FURÚMIÑETU LIGÁRADAN PÉDRO

Labúrūjan Pédro joun afíñetiña ja chagágubaña bougudi lueí jageíra

1 ¹Áu Pédro, ában láni Jesucrístu apóstolu áu, nabúrūjañoun gárada to jun, jugúya lánigu Búngiu ja chagágubaña bougudi lueí jageíra loúbawagu Pónto, Galácia, Capadócia, Ásia, lúma Bitínia. ²Nidújeñu, anúadaja láadün Búngiu Úguchili lúmagiñe meja bináriü lun lánigu jumá, áni subúdi lumúti meja luágu lachúlürüba lan ában wéyu lun ítara lúba lan, ladúga ligá lan lugúndaanbei. Ligá larúmadagüdañajañoun lubeí Sífiri Sándu janígi láu líta Jesucrístu, adúgalaün lun gagáambadi jumá. Ibíja jumá lubeíti sarágu abíniruni lúma darángilaü lúmagiñe Búngiu.

Loúchawagúba jafñen, ábame liábin buíti lídaangiñe

³Rúwama uweírighuni lun Búngiu, le Lúguchibei Wabúreme Jesucrístu, luágu luweírin lugúdemejabu woun. Rújali iséri ibágari woun queísi lirájüñü láu lásaaragüdüni Crístu lídaangiñe oúweni lúnya labágaridun. ⁴Queísi lirájüñü wabeí, gayáraati wemenigidun le gumúti luágu wabíjubei lan ubuíduni le aráanse láalibei wabá, gayáraati wemenigidun luágu werésibirubei lan alágan le areídañu lubeí Búngiu wabá, siélu—ában alágan le lúnbei ladúrarun lun sun dan, le siñábei ladáseirun, le siñábei leféridiruni lubuídun. ⁵Goúnigi lumútiwa Búngiu láu lubáfu lugúndun afíñe wamá luágu, lun gayáraabei lan wabíjini asálbaruni lídaangiñe asúfuriruni lánina uboú le, le aráanseñu lubeí wabá larígiñeme lagúmuchun uboú.

⁶Ligá lébubei buin jíña lan láu ugúndani, láu sun lúnti lán funa jasúfurirun sarágu oúchawagúni luágu murúsun dan. ⁷Lúnti jasúfuriruni oúchawagúni ladúga ítara líña lan jafñen quei gólu—lúnti louchúniwa láu wátu geméti lun larijiniwa ca lan luwúyeribei. Afíñeni le awánduti oúchawagúni ligá, buíti sügú láu gólu, lugúndun gagúmuchaditi gólu. Láu lubeíti jawánduni loúchawagún jafñen, ladímurejaba Jesucrístu buíti juágu dánme le lagíribudun uboúagun, jibíjuba gíñe uweírighuni lúma inébesei lúmagiñe.

⁸Jínsiñeti Jesucrístu jun láu sun maríjin jumágili lan, áni láu sun maríjin jumágili lan, rújumaali jeménigi luágu, áni gúndaatün láu ában

oúnwenbun ugúndani le siñá jumuti aríñaga láu dimúrei. ⁹Ladúga méme luweírin jafíñen luágu Crístu, jerésibiruñein tasálbarun juwáni.

¹⁰Lídan meja dan le sügújalibei, adímurejatiña meja profétagu luágu cátei le lúnbei líchuguni Búngiu jun láu lareíni, ába jáfaagun lun gunfaráanda jamáni luáguti asálbaruni le, le uágubei ladímureja Sífiri Sándu jádaangiñe. ¹¹Subúdigüda lumútija láni Crístu Espíritu joun wügúriña jagía le lúnbei lasúfuriruni Crístu lubáramegiwa, lúma uweíriguni le lúnbei liábin lárigiñe. Jagíati, ábaja jóuchun jasúbudiruni cátei lan gürígia ligía, lúma ídaba lan lasúsereda cátei le, le uágubei laríñaga Sífiri Sándu le jádaanbei joun. ¹²Ába lasúbudiragüdüni Búngiu joun luágu mámaba lan lídan jadáani lagúnfulirúa buri cátei le, luágu lídaanba lan wadáani. Asálbaruni lé meja uágubei jadímureja, ligía méme le uágubei japúrichija gürígia jun lídoun buri dan le, láu lubáfu Sífiri Sándu le ñúbinbei siéluigiñe. Ásta ánjeligu, buséntiña jamúga giñe gunfaráanda jamáni buri cátei le.

Busénti Búngiu lun wabágaridun ában ibágari le jarúmati

¹³Quei jagúrabajañein lubei jerésibiruni jalágaante siélu, gidájumei samínaü málati jaríttagunrugugiñe, lubáragiñe líra, derégüdagulá jaríttagun, rújumei sun jeménigi luágu asálbaruni le lúnbei líchuguni Búngiu jun láu lareíni dánme le lagíribudun Jesucrístu ubouágun.

¹⁴Queísi isáanigu gagáambaditiña, mabágarida jumá quei meja ligáburí jabágaridun lubáragiñe meja jasúbudiruni Búngiu. ¹⁵Lubáragiñe líra, abágarida jumá ában ibágari jarúmati le gumúti, lugúndun Búngiu le agúarubei jun lun lánigu jumá, jarúmati lídan sun cátei. ¹⁶Taríñajare Lerérun Búngiu. “Jarúma jumá, lugúndun áu, jarúmatina.”

¹⁷Queíti janúgiüni Búngiu quei Júguchi, Búngiu le ábanbei lábu ligáburí lagúseragüdüni jagáburí sun gürígia, lúnti júaradun lúma láu ában goúnigi sun dan le lúnbei jabágariduni ya ubouágu. ¹⁸Sálba láadiün Búngiu lídaangiñe lagúbüri ibágari lé meja jafúnrendeirubei jámagiñe binádu jagúbüriugu, áni subúdi jumúti buídu luágu máma lan láu cátei gagúmuchaditi lafáyeirúa lebégi asálbaruni le, queísi buri gólu o pláta, ¹⁹láu líta Crístu le gebégibeí sügü láu sun cátei lafáyeirúa. Derégewati Crístu lun loúnwen luágu wafígoun quei ában mudún le buídubei lídan sun luwúyeri, sálba wamámuga. ²⁰Lúmagiñe lubáragiñe buga ladúgiüni Búngiu ubou, ába laráanserun lun Crístuba lan Wasálbaragüle, luágu lubeíti wafúleisein lachúlaagua Crístu lídoun lagúmujoún dan le, lun lasálbaruníwa. ²¹Lídaangiñe Crístu, ába jiyábin lun jafíñerun luágu Búngiu le ásaaragüdübalin Crístu lídaangiñe ouweni, ru ligía uweíriguni lun, ítara líña jiyábin lun jafíñerun luágu, rújumeíme sun jeménigin luágu.

²²Guetó, láu gagáambadi jumá lun linárün Búngiu láu lubáfu Sífiri Sándu, jarúmaaru janígi lun gayáraabei lan jínsiñedun jidújeñu luegiñe Jesucrístu jun le tímatimaati. Lúnti lubeíti jínsiñegua jumá júngua láu sun tarúman janígi, lúma láu sun jére, ²³lugúndun iséri gürígia jugúya. Mámaadiün jasáanigu

agübüriгу ja goúwedaditiña, lirájüñüjadün Búngiu láu jagáambuni lerérun le íchugubei ibágari, le gíñe adúrarubei lun sun dan. ²⁴Taríñajare Lerérun Búngiu.

Ítara jáña sun gürígia quei jíduru,
liábin jaweírigun quei lufúlurin jíduru.

Dan le lásaurün jíduru, ába láburujan lufúlurin,

²⁵ánjein Lerérun Búngiu, duráti lun sun dan.

Áni dimúrei le, ligía ugánu le lánina asálbaruni le uágubei laríñawagúa jun.

2 ¹Ligía, queísi lirájüñüjadün lubei Búngiu, ígira jumei lubeiti sun luwúyeri wuríbani, sun eyéeni, biángua lan igíbu, gimúgaü, lúma sun luwúyeri marásualugu. ²Ítara quei jabúseeruni irájüñü figígíña mligi jarúmati lun gayáraabei lan jaweínamudun, ítaralá gíñe busén jumá lun jatúriajani Lerérun Búngiu buídu lun gayáraabei lan ledérebugudun jafíñen luágu Crístu. ³Subúdiadün murúsun luáguti luweírin lubuídun louseruníwa Crístu, lúnti íchugun subúdi ligía ában oúnwenbun ayúmajani jídoun lúntima jasúbudiruni Crístu.

⁴Ayárafajoúa jumá lubeiti lun Crístu le gabágaribei. Rútiña gürígia mebéreseni luágu, ánjeinti lun Búngiu, ítara líña Crístu quei ában dúbü le gebégiti sarágu, le lanúadirunbei lun ligíaba lan ébuu tun lilígílisin, áni sun ja afíñebaña luágu Crístu, jagía lilígílisinbaña Búngiu. ⁵Ítara líña lubeiti, ígiraguagüda jumá júngua lun Crístu le rúlaalíbei ibágari magúmuchaditi jun, lun tadügúniwa ában témpulu buítu lun Búngiu jídaangiñe, lun gíñe ítara jumá quei fádirigu ja deréguatiña jóungua lun Búngiu, ja íchugubalin cátei le áubei lagúndaara lun, lídaangiñe Jesucrístu. ⁶Ligía gíñe taríñagunbei Lerérun Búngiu.

Nóunajañein Crístu lun ligíaba lan dúbü le weírigutimaabei tuágu nilígílisin lídan fulásu le gíribei Sión.

Áni ja afíñerutiña luágu, buídubei lídin joun.

⁷Weíriti lebégi Crístu jun, jugúya le afíñebeí luágu, ánjeinti joun ja mafíñebaña, mebégití quei dúbü le únbei jamájara ábunagutiña. Láu sun líra, gúnfuljali le taríñagubei Lerérun Búngiu.

Dúbü le únbei jamájara ábunagutiña,
núbinja lun ligíaba lan furúmiñeti lídan bunáguai.

⁸Joun ja mafíñebaña luágu Crístu, gúnfuliti gíñe le aríñawagúbei.

Ában dúbü achúgeraguagúlei ligía, le eíguadagüdúti gürígia. Ja madügünbaña gásu láu ugánu lánina asálbaruni lídaangiñe Crístu, chugéguatiña luágu, féríditíña gíñe lun sun dan, queísi laráanseruni Búngiu.

Ja lánigubaña Búngiu

⁹Ánjeinti jugúya le afíñebeí luágu Crístu, ában família anúadajoúatiña jugúya, fádirigu ja esériwidutiña lun urúei le Búngiu, gürígia lánigu Búngiu ja derégeguaaña jóungua lun. Ítara líña cátei le, lun jadímurejan luágu buri cátei buíti le ladügübei Búngiu, le aságarubalün lídaangiñe lubúriga lun lídoun luweírin larúgounga le líchugubei Búngiu. ¹⁰Mibíjintün meja ában

abúremein lun latoúnigirunün, guetó lánigujadün Búngiu. Úatiña meja gudémejabutiña jun, ánjein guetó, gudémejabuti Búngiu jun.

Abágarida jumá lun jesériwidun lun Búngiu

¹¹Nidújeñu jínsiñetiña nun, jugúya queísi teréncha lídan uboú le, aganoútiña boúgudi lueí jageíra, ayúmuraguátina jun lun mígiraguagüdün jumá júngua lun lagúburi buri ayúmajani le ageíndagubei túma juwáni. ¹²Buídulá jóuserun jádan ja ibídiñejabubaña lun Búngiu, ítara lúba, láu sun lan adímureja jamá wuríba juágu guetó camá jamuga wuríbatün, jaríjubei buíti le jadúgübei, ábame jíchugun uweíriguni lun Búngiu dánme lachúlürün wéyu lun lagúseragüdün.

¹³Queísi lánigu jumá Wabúreme Crístu, ayúmuraguatina jun lun úaragua jumá lúma sun gumádi ya uboúagu. Gúnfuli jumá lúma lugúmadin urúei, quei ligía lántima íñubei ufílasun, ¹⁴gúnfuli jumá gíñe lúma jagúmadin gumádimatiña ja loúnajabaña lun jafáyeiragüdüniña ja múaradúnbaña lúma lúruđu, lúma lun jíchugun uweíriguni joun ja adúgübaña buíti. ¹⁵Busénti Búngiu lun jadúgüni le buídubei, lun jámanichagüdüniña ja ibídiouguabaña áu, ja busénbaña jadímurejan wuríba juágu.

¹⁶Queísi lirájüñü jumá Búngiu, oúsera jumá queísi gürígia ja mámabaña idámuni lun ni ában gürígia, máma lueígiñe líra lun jadúgüni le wuríbabei, lubáragiñe líra, abágarida jumá queísi lidámun Búngiu.

¹⁷Inébe jamá sun gürígia jun queísi lubúdubu, jínsiñe jamá jidújeñu lueígiñe Jesucrístu jun, inébelá Búngiu jun, inébelá urúei jun.

Jémpulu luáguti lasúfurirun Crístu

¹⁸Umúsuniña, inébe jamá jiyúbudirigu jun queísi lubúdubu, mámarügü ja buídubaña júma, ásta gíñe ja wuríbabaña. ¹⁹Lugúndun labínirubei Búngiu gürígia le awándubei asúfuriruni le mébunati láu larítangun luágu Búngiu. ²⁰Ánjaün adúga cátei wuríbati, jafáyeira luágu, málati gagúraasun jumá luágu líra, ánjaün asúfurira lueígiñe jadúgün cátei buíti, ába jawánduni láu gurásu, buíti líra ligíbugiñe Búngiu. ²¹Lun luwúyeri igáburi le lagúara Búngiu juágu, quei sáfuri lubeí Crístu juágu láu gurásu, íchiga ában jémpulu jun lun jafálaruni. ²²Madúgünti Crístu ni ában figoú, meyéeragun ligía gürígia ni ában weíyaasu. ²³Dan le janábuni, moúnabunti láu anábajani, dan le jasúfuriragüdüni, masíadirun lumútiña, lubáragiñe líra, derégeguarügüti lúngua lun Búngiu le agúseragüdübei lau ísuruni. ²⁴Barú lumuti Crístu guánarügü wafígoun luoúgua luágu gurúwa lun weréderun quei jiláñu lun figoú, lun wabágaridun ában ibágari le lánina ísuruni. Buleíseiwati lun wareídagun. ²⁵Ítara jíña meja quei mudún ja féridijaña, ánjein guetó, núbínjadün lun Crístu le oúnigirubalün queísi jóúniri mudún, toúnigiloún juwáni.

Ligáburi jabágaridun maríeitiña

3 ¹Ítara gíñe jugúya würiña gámaritiña, derégegua jumá júngua joun júmarigu, lun ánjein lan mánjagiña lubei lun ugánu lánina asálbaruni, gayára lámuga jayábin lun jafñerun luágu Crístu, maríñagunga jugúya ni cáta joun luágu asálbaruni, ²láurügü jarjini lubuídun jouseruniña láu inébesei kúma larúman igáburi. ³Mámalá láu buri cátei bouguditi jibíti jewéndeda, quei buri lanárame aroúraguni, arígeilaü kúma buri bángüli le gólu, anáanguni wéndegutu, ⁴tídaanlá janígi jewéndeda, le ábanbei ubuíduni le meféridirawadibei. Ában igáburi bímeti, darángila, ligía cátei gebégibei sarágu ligíbugiñe Búngiu. ⁵Ítara liñá meja ligáburi jewéndedun würiña já meja derégeguañabaña jóungua lun Búngiu lídan meja dan le sügújalibei. Jeménigitiña meja luágu Búngiu, derégegua jagía jóungua joun jámarigu. ⁶Ítara tiñá meja Sára. gagáambaditu lun Abrahám, ába tagúarun lun, “nabúreme” lun tarúfuduni linében tun. Jiyábinba lun ítara jumá quei tugúya ánjein jadúga le buídubei, manúfudeiga luei ni cáta.

⁷Jugúya gíñe wügúriña, áfaagua jumá lun gunfaráanda jumániña júmarigu. Rújumei jafúlasun joun, mámarügü lueígiñe mére tántima wúri, lugúndun gíñe rúlaani Búngiu ibágari méme magúmuchaditi le líchugubei jun láu larefni, joun. Adúga jumei ítara, úa lámuga ni cáta lun leréderunün luei jayúmuragun lun Búngiu.

Ja asúfurirubaña lueígiñe jadúgüni le buídubei

⁸Abágarida jumá sun jugúya lídan úarani lúma láu gudémeyabu jídaangua, jínsiñegua jugúyame júngua queísi idújeñu lueígiñe Jesucrístu. Areída jumá, únabu ligíame janáangun júngua. ⁹Máguyugüda jumá wuríbani luágu wuríbani, ni anabúni luágu anabúni, lubáragiñe líra, águyugüda jumá abíniruni, lugúndun lun jerésibirun abíniruni lúmagiñe Búngiu lagúaraün. Lugúndun taríñajare Lerérun Búngiu.

¹⁰Le busénti labágaridun ában ibágari buíti, lúma gíñe ában ibágari lánina ugúndani,

lúnti loúnigiruni liyúma luei ladímurejan wuríbani,
maríñagun ligíame iyéeni.

¹¹Lúnti ladísedun luei wuríbani lun ladúgüni buíti,
láluajani darángilaü lun labágariduni súnwandan.

¹²Lúnti ítara lan ligáburi, ladúga toúnigi lumútiña Wabúreme Búngiu
ja richáguabaña ligíbugiñe,
agáambalei jayúmuragun lun.

Ánjein ja adúgübaña wuríbati, magúndaati Búngiu jáu.

¹³¿Cábagi gayára ladúgün wuríbati jun, ánjaün íchaagua júngua lun jadúgüni buíti súnwandan? ¹⁴Áni íbini jasúfurirun ladúga lísurun jibágari, gúnda jumá ladúga fuleísewa jumá lídan le jasúfurirun luágu Crístu. Manúfude jumá luei ni ában, madíjeri ligíame jarítangun. ¹⁵Deréeguarügü

jumá júngua le gumúti lun Crístu quei Jabúreme, aráanseñu jumá súnwandan lun jóunabuniña ja álügüdütün ca lan ueígiñe jeménigida luágu Crístu, láu maweíriguni lúma láu inébesei. ¹⁶Buídulá jóuserun, darángilañu támuga janígi, lun ja lan adímurejabaña wuríba luágu lubuídun jigáburí queísi afíñetiña luágu Crístu, nibúsigari jamámuga luágu jerérun guánariügü. ¹⁷Buítimaati lun jasúfurirun lueígiñe jadúgün buíti, ánjein ítara líña lubeí labúseeruni Búngiu, sügü láu lun jasúfurirun lueígiñe jadúgün wuríbati.

¹⁸Jarítagua jumá luágu luweírin lasúfurirun Crístu dán meja le loúnwenbei luágu wafígoun ában weíyaasu lun sun dan. Buíti meja Crístu, ába lasúfurirun wawágu, wagía le wuríbabei, lun lanúgüníwa lun Búngiu. Áfarúati jilágubei, wínwantu láni Espíritu. ¹⁹Quei Espíritu, nüdünti gíñe apúrichija joun espíritugu ja lídaanbaña jafúlasun jiláaña. ²⁰Espíritugu jagía, gürígia ja wínwanbaña lídan meja lidáani Noé, magáambaditiña meja gürígia jagía lun Lerérun Búngiu láu sun arúfuda láni Búngiu luweírin lugúraasun joun lídan le lagúrabajani tagúmuchún árca to ladúgüboun Noé. Mánjatiña jagáambuni Búngiu, ába jasálbarun wídürügü gürígia lídaangiñe luweírin gúnran ligía. ²¹Dúna ligía, ítara líña quei lidúnarina badísei guetó, le ídaangiñebei wanügüwa lun wasálbarun. Máma lun larúmadun úgubu abásteruni, arúfudarügü lumúti luágu jarúmaaru tan wanígi ligíbugiñe Búngiu láu waffínerun luágu Crístu, luágu gíñe sálbaadiwa lan láu lásaarun Crístu lídaangiñe ouweni lúnya labágaridun. ²²Múdeiti Crístu siélun, áni níjein guetó ñun lueígiñe loúnwenren Búngiu jáu sun ánjeligu jáma sun jíbiri ubáfu siélu labugiñe lubáfu.

Wesériwidun láu ubáfu le líchugubei Crístu woun

4 ¹Ligía, ítara quei sífuri lubeí Crístu ya ubouágu wawágu, lúnti gíñe aráanseñu wamá lun wasúfurirun láu gurásu luágu. ²Le sífurijalibei luágu Crístu, ígira láali figoú lun labágariduni líbiri libágari queísi lugúndan Búngiu, máma lun líchugun ugúndani lun lagúburi ayúmajani. ³Lídan meja dan le sügújalibei, adúga jumúti meja luríban buri cátei le jínsiñebei joun ja ibídiñejabubaña lun Búngiu, jaganouña meja lídan ibágari nibúsigaridünati, gúnfulitün meja lúma luríban jayúmajan, abácharuada, adáagua fédu, átagua sarágu, ájuduragua joun sándu, le moúnbei ladúgúniwa. Buídurúgaali dan le abágarida jumáalibei ítara. ⁴Guetó, weíriti janígi já meja jumádagubaña láu mafála jumáaña lan lídan lagúburi ibágari le, ligía jadímurejanbei wuríba juágu. ⁵Ánjeinti jagía, jagúfesaruba ligíbugiñe Búngiu, le aráanseñubei lun lagúseragüdüniña wínwangiña jáma jiláguaaña, madíse. ⁶Ligía apúrichijouá lubeí meja luáguti asálbaruni joun ja jiláguañábaña guetó, lun gayáraabei lan gabágari tan jawáni láu libágari Búngiu, láu sun jilá lan jágubu queísi lasúseredun joun sun gürígia.

⁷Yaráfaali lagúmuchun ubou, ligía lúnti lubeí aráanseñu jumá, ragúgua jugúyame júngua, derégegua jugúyame júngua lun ayúmuraguni lun Búngiu. ⁸Lougiñe sun cátei, níjeinlá sarágu ínsiñeni jídan joun jíbirigu,

lugúndun ánjaün jínsiñejabu, ferúduna jubeí jafígoun ámu juágu, láu sun gíbe lan. ⁹Resíbi jumáña gürígia júbiñe láu sun jugúndan. ¹⁰Rújali Búngiu ában ubáfu lun ságü afíñeti luágu Crístu, ítara liña lubeíti, seríwi jumá joun jíbirigu láu ubáfu le rúlaalíbei Búngiu jun, queísi oúniri buítiña lánina ubáfu buri le líchugubei Búngiu. ¹¹Le gabáfubei lun lapúrichijan, lúnti ladúgüni queísi ában le adímurejati dimúrei lúmagiñe Búngiu. Le esériwiduti, adúgaleí láu sun érei le líchugubei Búngiu lun. Sun cátei le jadúgübei, adúga jumeí lídan ában igáburi le lúnti líchugúniwa uweíriguni lun Búngiu láu, lídaangiñe Jesucrístu. Búngiu le Súnti Gabáfu, ligía le lúnbei lerésibiruni uweíriguni lun sun dan. Ítaralá.

Wasúfurirun queísi lánigu Crístu

¹²Nidújeñu jínsiñetiña nun, maweíridalá janígi láu buri lidíjeri oúchawagúni le jibíjubei, camá jamuga ába cátei ámuti asúseredubei jun. ¹³Lubáragiñe líra, gúnda jumá luágu gafánran jumá lídan lasúfurirun Crístu, lun gayáraabei lan jabuínchun láu ugúndani dánme le lagíribudun Crístu ubouágun láu sun luweírigun. ¹⁴Fuleíseiwatün ánjaün anabúa lueígiñe lánigu jumá Crístu, lugúndun arúfuda lumúti líra luágu njein lan Sífiri Sándu, le weírigubei, jídan. ¹⁵Ánjein asúfurira ában jidaangiñe, lun máma lan lueígiñe láfarajan, o lueígiñe lan líwerujan, ni lueígiñe ladúraaguni líbiri lúruđu, ni lueígiñe leméterun lídoun cátei le miábinti lun, mídin. ¹⁶Ánjeinti asúfurira mútu lueígiñe lánigu lan Crístu, moún lumuti lanúgün busíganu, lúnti líchugun etefngiruni lun Búngiu luágu lánigu lan Crístu.

¹⁷Chülújali dan lun lagúmeserun luweírin asúfuriruni, jámagiñe guánarügüba lánigu Búngiu lagúmesera. Ánjeinti lagúmeseruña lubeí asúfuriruni ítara wámagiñe, weíritimaabei jasúfurirun ja mánjabaña jerésibiruni lerérun Búngiu. ¹⁸Ánjeinti jénreengu lubeí jasálbarun ja buídubaña, ¿cábagi asúsereda joun ja wuríbabaña, jáma ja gafígounbaña? ¹⁹Ja lubeíti asúfurirubaña queísi labúseeruni Búngiu, lúnti ítara méme jamá adúgei le buídubei, derége jamoúnme jawáni lújaburugun Búngiu le adúgübañi, lugúndun gayáraati wemenigidun luágu Búngiu lun lagúnfulirun láu lerérun.

Lerérun Pédro joun afíñetiña

5 ¹Níchuguñein nerérun jun, jugúya ja ábutigubaña lídan jadámurin afíñetiña, queísi ábuti lan gíñe áu quei jugúya, áni geféentina gíñe luágu lasúfurirun Crístu, áni gabárabadina gíñe quei jugúya lídan uweíriguni le lúnbei liábin. ²Toúnigi jumáña lirájüñü Búngiu ja lábugiñebaña jaríaajan queísi joúnigiruniña joúniri mudún mudún. Adúga jumeí láu ugúndani queísi labúseeruni Búngiu, máma ladúga jafósuruña lan, adúga jumeí ladúga busén jumá jesériwidun lun Búngiu, máma ladúga línsiñegu seínsu. ³Móusera jumá camá jamuga jabúriña ja lábugiñebaña jaríaajan jugúya, joúcharügü jumá

lun ában jumá jémpulu buíti joun. ⁴Ítara lúba, dánmeti le liábin Jesucrístu, le joúniri mudún le tímatimaati, jibíjuba ában uweíriguni le weíriguti le ladúraruba lun sun dan, le mítaraanbei quei rídi le láuti ubánaü le gásaürati.

⁵Jugúya gürígia nübüriña, rúgua jumá júngua lábun jagúmadin weíyaña mútu. Lúnti jesériwidagun súngubei joúnigua láu manáanguni únguau, lugúndun taríñajare Lerérun Búngiu.

Magúndaanti Búngiu jáu ja barúguabaña joúngua,

áni íderagua lumútiña ja manáangunbaña joúngua, láu lareíni.

⁶Rúgua jumá lubeíti júngua únabu lábugiñe lújabu Búngiu le gabáfubei, lun gayára lan líchuguni uweíriguni jun dánme le lachúlürün dan ligía.

⁷Madíjeri jumá luágu ni cáta, ígira jumeí sun cátei lun Búngiu, lugúndun laríjiña jáu le tímatimaati.

⁸Agáguduañu jumá, ragúguañu jumá júngua, lugúndun efbugañajádügü líña Máfia le jágani queísi liñún gáñiti áluaja cába lan lagúnrinchagua.

⁹Mígraguagüda jumá júngua lun, derégüdagu jumá lídan jaffñen, subúdiñu jumeí luágu ligía méme lan gíñe jasúfurirubei jidújeñu lueígiñe Crístu lídan sun fulásu.

¹⁰Lárigiñeme súfurijadün lan luágu murúsun dan, ladúgübadün Búngiu lun úa lan mégeiti luágu lubuídun jigáburí, derégüdagu lídan jaffñen, surúñu, láu ubáfu lun jawánduni sun cátei. Ligía méme Búngiu le íchugubalin sun abíniruni woun, le gíñe agúarubei woun lun gafánran wamá lídan luweírigun le magúmuchadibeí, lídan ában kúma Jesucrístu. ¹¹Ligía le Súnti Gabáfu lun súnwandan. Ítaralá.

Lagúmujoún buri mábugaü

¹²Noúnajañoun tiraúraü gárada to jun lúma Silváno, le nanúgübei queísi ában idújei úaraguati, lun níchugun dúgüdaguaü lun jaffñen, geféen áume jun luágu abíniruni lan le jerésibirubei, larúfuduñsun cátei. Ligía méme Búngiein lan línsiñejabu Búngiu jun le tímatimaati. Madísedagua jumá lueí línsiñejabu Búngiu ligía.

¹³Mábuga jáña affñetiña ja Babilóniabaña jun, ja gíñe lanúadajabaña Búngiu lun lánigu jamá queísi lanúadajanün. Mábuga líña gíñe Márcos jun, le ítarabei camá jamuga niraú. ¹⁴Chúgua jumá júngua lídan líri Wabúreme, arúfuda jumámugei luágu lídaañadiwa lan ában wámagua.

Darángila jumá sun jugúya le lánigu Jesucrístu. Ítaralá.